

Vjetropark u Podveležju je godinama najavljivani projekt Elektroprivrede BiH kojim se naša zemlja treba približiti standardima proizvodnje čiste energije iz obnovljivih izvora. Međutim, realizaciju jedne od kapitalnih investicija u čistu energiju u našoj državi pratila su brojna odgađanja.

«Nažalost, ovaj projekat kao i neke druge projekte Elektroprivrede BiH, pratila su kašnjenja. Međutim, mi smo sada čvrsti u odluci da se termini i rokovi moraju ispoštovati. Sa Mostarom imamo koncesioni ugovor po kojem proizvodnja mora početi do kraja 2018. godine», istakao je Senad Salkić, direktor za kapitalne investicije Elektroprivrede BiH. Za razliku od naše države, Evropa nema problem s najavama i odgađanjima. Naučnici i privrednici iz zemalja koje prednjače u zelenoj energiji dolaze u našu zemlju i predstavljaju pozitivne primjere iz prakse "zelene industrije". Pored toga što proizvode struju iz obnovljivih izvora, recikliraju baterije, pa i otpad. Razvoj čistih tehnologija prati razvoj industrije i privredni rast.

«Trenutno radimo na poboljšanju tehnologije pretvaranja različitog organskog otpada, poput ostataka hrane, u biogas koji se kasnije može koristiti kao izvor struje ili topline», kazala je Kristine Ruģele, predavačica na Tehnološkom univerzitetu iz Rige.

Svi se slažu da je zelena energija budućnost. No, u Bosni i Hercegovini to ide sporo, uprkos potencijalima koje naša zemlja ima.

«Ne može se potcijeniti promjena koja se događa u svijetu, čijim će dijelom Bosna i Hercegovina biti prije ili kasnije. Veliki ulagači premještaju novac od fosilnih goriva prema obnovljivim izvorima energije», naglašava Morten Halvorsen, stručnjak za zelenu industriju iz Norveške.

Prema najavama, prvi radovi na izgradnji pristupnih puteva vjetroparka u Podveležju trebaju početi najkasnije do proljeća naredne godine. Stručnjaci iz Evrope smatraju da bi Bosna i Hercegovina trebala posvetiti više pažnje razvoju čistih tehnologija, naročito ako se uzmu u obzir napori Evropske unije prema zaštiti okoliša i razvoju tehnologija zelene industrije.

izvor: indikator.ba